

2012 Ar Redadeg Brezhoneg ha plijadur



Plijadur a vefe gant ar brezhoneg, zo bet lavaret din ?

Oh ya, sur !

A vloaz da vloaz,

A zeiz da zeiz,

A di da di,

Plijadur bemdez

Da goan ha da greisteiz !

N'eus ken 'met gwelet tout ar pennoù loar-gann a zo amañ fenoz war ar blasenn...

Lod eus an dud zo skuizh-mat o botoù goude ar redadeg, sur, met levezet zo en o daoulagad.

Ken pell ma c'hellan gwelet ne welan nemet dremmoù lirzhin. Ha c'hi c'hi ha c'ha c'ha, forzh pegement.

Ma ! Marteze, piv 'oar... 'z eus memestra un bennak, kuzhet en ur c'horn, hag a ziskouez ur penn ludu ?

Opala ! Ya, unan zo, pell-pell e penn all ar blasenn. Ne gred ket diskouez beg e fri tostoc'h 'meus aon...

N'anavezan ket anezhañ met goût a ran petra zo a-dreuz gantañ fenoz :

Ne oar ket brezhoneg hennezh, ha tristik eo, en e unan-penn emañ, paourkaezh.

Un dra bennak a vank dezhañ, un dra bennak hag a chom war e galon.

Ret eo reiñ un tamm sikour dezhañ, 'gav ket deoc'h ?

Ar gerioù-mañ zo evidout, mignon :

'Rez ket biloù, deus ganeomp da c'hoari, da zañsal, da flapiñ, da c'hoarzhin e-leizh da c'henoù ! Gouel zo !

'Rez ket biloù, na chom ket war da c'hoant, deus da zeskiñ yezh da vro.

Ne welan ket mat ac'hanout, ken pell e foñs ar blasenn, deus tostoc'h 'ta, traoù 'm eus da lavaret dit.

N'out c'hoazh nemet ur babig en da garrigell ?

Ne vern. Goul' gant da vamm ha da dad lakaat da anv en ur skol vrezhonek. Plijadur a vo war ar porzh hag er c'hlas, gant ar vugale all, prometiñ 'ran dit ! Goût a ran, mestrez-skol on bet.

Ha me lavar dit, labouret e veze, desket e veze, ya, met ne oa ket trist an devezhioù-skol ganeomp !

Paotr yaouank out, plac'h yaouank ?

Ale bec'h de'i ! Kentelioù noz, stajoù, vakañsoù war ar mor pe war varc'h pe me 'oar-me.

Ha neuze deskiñ kanañ, gwelet filmoù, aozañ filmoù ha pezhioù-c'hoari, pourmen war internet da flapiñ gant

ur bern mignonned, lenn bannoù-treset ha romantoù polis, sevel kanaouennoù, ha rock ha rap,

ha me 'oar-me petra c'hoazh, ha kavout ur vicher blijus, soñj 'ta, paotr, kement tra a blij dit ober a c'helli

ober e brezhoneg, rannañ gant da gamaladed ! Plijadur a vo ganit ivez, sur !

Met petra c'hoazh a glevan ? Re gozh out evit deskiñ ? Klevet t' eus pas oas yaouank ha disoñjet tout ?

Opopop, petra eo ar ganaouenn-se ?

Dastum da zigarezioù toull 'ta, frai kozh ! Tap da sac'h ha sach da gorf, me zo sur 'z eus tu bennak e-kichen

du-se kentelioù pe skipailhoù tud o 'n em vodañ evit prezeg, lenn levrioù, selaou kontadennoù,

ha mont da vale, ha fardañ boued lipous, ha pakañ banneoù, ha c'hoari kartoù, ha liorzhañ... ha kement-se

e brezhoneg c'hoazh ! 'Mod-se 'vez desket ivez !

N'eo ket plijadur an dra-se ?

Ma ! N'eo ket dav kontañ bidennoù ivez. Ne vez ket c'hoarzhed bemdez memestra.

A-wechoù, re alies, e ranker stourm ivez, hag huchal, ha klemm, ha mont e fulor,...ha redek !

Rak e pep lec'h, pell pe dost, ez eus pennoù bleup ha na blij ket hor yezh dezho. Tud hag a garfe diskar

anezhi. Tud hag a ra o seizh posubl evit lazhañ hon teñzor. Aon o deus, soñj 'ta !

Ober dezho kompren n'omp ket tud sot, tud drouk, tud 'mod kozh ?

Poan hag amzer gollet. Bezañ divrall, finoc'h ha kreñvoc'h evito, sed aze ar pezh a rankomp ober.

Ha ya 'vat, labour zo. Ezhomm zo eus startijenn pep hini. Ret e vo redek c'hoazh !

Ale, mignon, na chom ket 'barzh da gorn'ta, tristik tout, deus ganeomp da zeskiñ yezh da vro, deus da

stourm, deus da c'hoari, pe da flapiñ, pe da zañsal, deus da bakañ ur banne !

Ha piv 'oar, ken buan all e kavi da garantezig amañ fenoz ?

Unan hag a oar brezhoneg flour, hag a gano gerioù tener dit ?

Soñj 'ta, mignon, n'eo ket ur blijadur a vo neuze, nann 'vat, seizh plijadur, sur ha bisur !

Deus 'ta ma mignon, deus 'ta war an aod ha ni hon no plijadur, plijadur...(mouskanet)

Mich Beyer